

LOCAL

Minister di Cultura, Fredis Refunjol:

"Nos mester ta orguyoso di Aruba y di nos mes"

ORANJESTAD - En
conexcion cu nos dia Nacio-
nal lo mi kier a dedicá e
mensahe aki specialmente
na nos hubentud.
Un país sin hubentud ta

un país sin porvenir

Esaki ta conta pa tur cos,
den tur sentido y no solamen-
te den ramo di yuda guiá nos
país den futuro. Nos hoben-
nan di awe lo ta e mayornan
y despues nos grandinan di
mañan. Ta nan lo tin cu per-
curá pa mantené nos pobla-
cion y na nan turno duna guiá
na e generacionnan nobo cu
lo lanta bao di nan.

Tur pueblo tin nan propio
systema di biba y pensa, cu
for di chiquito cada hende ta
lanta y crece cuné. Tur pobla-
cion den mundo tin e senti-
mentonan general universal
manera amor y paz.

Sinembargo banda di
eseynan cada poblacion tin su
aspectonan ey y cu ta
determiná pa formacion di
sentimentonan di un pueblo.
Recuerdo y experiencia ta
elementonan cu ta contribuí
na nos sentimentonan. Den e

mundo moderno cu nos ta
biba den tin varios técnica pa
registrá e recuerdo y experien-
cianan aki.

Sinembargo ainda no ta
existí un manera pa registrá y
conservá sentimentonan hu-
mano pa prosperidad. E senti-
mentonan t'ey pasobra nan
ta pasa di generacion pa
generacion. E sentimento pa
pertenecé ta fundamental pa
existencia di un hende. Per-
tenecé na bo famía, pertenecé
na bo pueblo, pertenecé na bo
país. Un hende cu no ta perte-
necé ningun caminda, nunca
lo haya e sentimento di exis-
tencia.

Riba un dia Nacional,
manera 18 di Maart, ta bon
pa realizá na unda nos ta
pertenecé. Nos ta pertenecé
na un pueblo cu conhun-
tamente nos mes ta forma.
Cada un di nos ta Aruba y ta
Aruba ta e sentimento cu nos
tur tin en común. Kiko Aruba

realmente ta, ta difícil pa ex-
presá. Pero nos por registrá lo
mas hopi posibel pa asina
purba demostrá y conservá
esey.

Den esaki nos ta haci uso
di posibilidadnan humano cu
nos tin. Nos ta usa palabra,
texto, intonacion, melodía y
ritmo, canto y música, color y
símbolo pa nos por expresá e
sentimentonan cu nos tin en
común. Un melodía suave in-
mortal pa cuadra cu e ama-
bilidad y cordialidad di nos
hendenan. Un ritmo trankilo
pa nos pueblo culto, caluroso
y hospitalario.

Un color briyante pa
naturaleza di nos país...Asina
nos ta yega na nos Himno,
Bandera y Escudo cu ta sim-
bolizá cada un di nos. Respet
na e símbolonan aki ta respet
na nos mes. Aprecio pa e
símbolonan aki ta aprecio pa
nos mes. E símbolonan aki ta
sentimento di nos pueblo. □